

agás nos casos de transmisión ou cambio de titularidade da explotación, falecemento, invalidez permanente ou xubilación do seu anterior titular, ou nos casos de primeira incorporación de mozos á titularidade ou cotitularidade da explotación agraria. Este requisito será exixible, igualmente, aos socios de cooperativas e sociedades agrarias de transformación acollidos ao artigo 4.2.

c) Estar en condicións de uso e non de abandono.

d) Ser entregado a un centro autorizado de tratamento ou a unha instalación de recepción, regulados no Real decreto 1383/2002, do 20 de decembro, sobre xestión de vehículos, ao final da súa vida útil, e na Orde INT/249/2004, do 5 de febreiro, pola que se regula a baixa definitiva dos vehículos descontaminados ao final da súa vida útil, para a súa destrución.

e) Causar baixa definitiva no ROMA, cunha anotación en que se faga constar que foi desmantelado. Así mesmo, deberá causar baixa definitiva no Rexistro de vehículos, caso de estar inscrito nel.»

Cinco. O artigo 6 queda redactado do seguinte modo.

«Artigo 6. *Requisitos do novo tractor ou máquina.*

O novo tractor ou máquina debe cumprir os seguintes requisitos:

a) Ser adquirido en data posterior á de solicitude da axuda.

b) Quedar inscrito, como de primeira adquisición, no ROMA correspondente.»

Seis. A alínea f) do número 1 do artigo 7 e o número 3 deste artigo quedan redactados como segue:

«f) Marca, modelo e prezo neto, sen IVE, do novo tractor ou máquina que se adquira. En todo caso, xuntarase unha factura pro forma.»

«3. No caso de solicitudes desestimadas por falta de orzamento, os seus titulares poderán presentar unha nova solicitude, dentro do prazo sinalado pola convocatoria a que se acollan, que será resolta no prazo sinalado por esta, séndolles de aplicación o disposto na data de concesión da axuda e considerándose, para os efectos do artigo 6, como data de solicitude a inicialmente presentada.»

Sete. Engádese unha nova disposición adicional sétima, coa seguinte redacción:

«Disposición adicional sétima. *Información pública.*

O Ministerio de Agricultura, Pesca e Alimentación difundirá e actualizará a través da súa páxina web: <http://www.mapa.es/es/agricultura/pags/maquinariaagricola/renovacion.htm>, a relación de fertilizadoras e de equipamentos de tratamentos fitosanitarios seleccionados para estas axudas, de acordo cos criterios elaborados conxuntamente pola Dirección Xeral de Agricultura e as estacións de ensaios específicas para este tipo de máquinas.»

Disposición derradeira única. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 15 de febreiro de 2008.

JUAN CARLOS R.

A ministra de Agricultura, Pesca e Alimentación,
ELENA ESPINOSA MANGANA

MINISTERIO DA PRESIDENCIA

4146 *CORRECCIÓN de erratas do Real decreto 1544/2007, do 23 de novembro, polo que se regulan as condicións básicas de accesibilidade e non discriminación para o acceso e utilización dos modos de transporte para persoas con discapacidade. («BOE» 55, do 4-3-2008.)*

Advertida errata no Real decreto 1544/2007, do 23 de novembro, polo que se regulan as condicións básicas de accesibilidade e non discriminación para o acceso e utilización dos modos de transporte para persoas con discapacidade, publicado no «Boletín Oficial del Estado», suplemento en lingua galega núm. 32, do 14 de decembro de 2007, procédese a efectuar a oportuna rectificación:

Na páxina 3984, primeira columna, onde di: «3.3.3», debe dicir: «1.2.3».

MINISTERIO DE ECONOMÍA E FACENDA

4204 *ORDE EHA/564/2008, do 28 de febreiro, pola que se modifica a Orde ECO/805/2003, do 27 de marzo, sobre normas de valoración de bens inmobles e de determinados dereitos para certas finalidades financeiras. («BOE» 56, do 5-3-2008.)*

O obxectivo desta modificación encóntrase na valoración legal do solo e a súa relación coas normas de valoración de bens inmobles para determinadas finalidades financeiras.

A Lei 8/2007, do 28 de maio, de solo, establece uns criterios de valoración que son exclusivamente aplicables aos supostos legalmente taxados, sen que tales criterios se apliquen ás finalidades recollidas nesta orde. Porén, pode existir un punto de conexión entre ambas as normas se no proceso de valoración se toma en consideración a posibilidade de os solos obxecto dela poderen ser eventualmente obxecto de expropiación. Isto deriva da exixencia do principio de prudencia enunciado no artigo 3.1.f) desta orde. Razóns de seguranza xurídica aconsellan clarificar a aplicación do principio de prudencia en relación coa posibilidade expropiatoria.

Esta orde dítase ao abeiro das habilitacións normativas recollidas no artigo 37.4 do Real decreto 685/1982, do 17 de marzo, polo que se desenvolven determinados aspectos da Lei 2/1981, do 25 de marzo, de regulación do mercado hipotecario; o artigo 57.1 do Real decreto 1309/2005, do 4 de novembro, polo que se aproba o Regulamento da Lei 35/2003, do 4 de novembro, de institucións de investimento colectivo, e se adapta o réxime tributario das institucións de investimento colectivo; no artigo 50.10 do Regulamento de ordenación e supervisión dos seguros privados, aprobado polo Real decreto 2486/1998, do 20 de novembro (segundo a redacción dada polo Real decreto 239/2007, do 16 de febreiro); e o artigo 75.2 do Regulamento de plans e fondos de pensións (aprobado polo Real decreto 304/2004, do 20 de febreiro).

Na súa virtude, dispoño:

Artigo único. *Modificación da Orde ECO/805/2003, do 27 de marzo, sobre normas de valoración de bens inmo-
bles e de determinados dereitos para certas finalidades
financeiras.*

Engádese unha disposición adicional sétima á Orde ECO/805/2003, do 27 de marzo, sobre normas de valoración de bens inmo-
bles e de determinados dereitos para certas finalidades financeiras coa seguinte redacción:

Disposición adicional sétima. *Aplicación do principio de prudencia en relación coa posibilidade expropiatoria.*

1. Para os efectos da aplicación do principio de prudencia a que se refire o artigo 3.1.f), a posibilidade de expropiación forzosa dun inmovible só se considerará como un dos escenarios ou posibilidades de elección igualmente probables nos seguintes casos:

a) Cando se iniciase o procedemento de expropiación do inmovible.

b) Cando se aprobase un instrumento de ordenación territorial ou urbanística, plan ou proxecto de calquera tipo, que comporte a declaración de utilidade pública e a necesidade de ocupación dos bens e dereitos correspondentes, cando os devanditos instrumentos, plans ou proxectos habiliten para a súa execución e esta se deba producir por expropiación.

c) Cando a Administración competente declarase, mediante resolución administrativa con audiencia dos interesados, o incumprimento dos prazos ou demais deberes inherentes ao proceso de urbanización ou de edificación do solo e, de conformidade co disposto na lexislación sobre ordenación territorial e urbanística, isto poida dar lugar á expropiación do ben correspondente.

d) Cando na data da valoración estivese incoado expediente de incumprimento dos prazos ou demais deberes inherentes ao proceso de urbanización ou de edificación e, de conformidade co disposto na lexislación sobre ordenación territorial e urbanística, isto poida dar lugar á expropiación do ben correspondente, pero non se ditase aínda resolución administrativa.

2. Nos supostos previstos no punto anterior, a valoración corresponderá á menor entre a resultante de aplicar os criterios establecidos na Lei 8/2007, do 28 de maio, de solo, e os desta orde. Nestes casos, considerarase que existe un suposto de advertencia de conformidade co disposto no artigo 11.c) desta orde.

3. Cando vencesen os prazos para o cumprimento dos deberes de urbanización ou de edificación do solo:

a) Se non se incoou o procedemento de declaración de incumprimento dos ditos deberes, a valoración conforme os criterios desta orde incluírá unha advertencia que indique que, en caso de declaración administrativa de incumprimento e posterior expropiación dos terreos, estes se valorarán de conformidade cos criterios establecidos na Lei 8/2007, do 28 de maio, de solo.

b) Se non se puido comprobar a existencia de procedemento de declaración de incumprimento dos deberes, a valoración quedará condicionada a que se acredite a inexistencia do dito procedemento, ademais de formular a advertencia a que se refire a letra anterior.

Disposición derradeira única. *Entrada en vigor.*

Esta orde entrará en vigor o día seguinte ao da súa publicación no «Boletín Oficial del Estado».

Madrid, 28 de febreiro de 2008.—O vicepresidente segundo do Goberno e Ministro de Economía e Facenda, Pedro Solbes Mira.

MINISTERIO DE AGRICULTURA, PESCA E ALIMENTACIÓN

4207 *REAL DECRETO 225/2008, do 15 de febreiro, polo que se completa a aplicación do modelo comunitario de clasificación das canais de vacún pesado e se regula o rexistro dos prezos de mercado. («BOE» 56, do 5-3-2008.)*

A implantación do modelo comunitario de clasificación das canais de vacún pesado, impulsado pola aplicación das disposicións do Real decreto 1892/1999, do 10 de decembro, polo que se aplica o modelo comunitario de clasificación das canais de vacún pesado e as normas comunitarias sobre o rexistro de prezos, contribuíu positivamente á mellora das condicións de normalización e transparencia na comercialización no mercado cárnico. Esta norma legal, que adaptaba as disposicións establecidas na lexislación comunitaria aplicable, serviu de ferramenta fundamental para apoiar a mellora das condicións de posta en tráfico comunitario do vacún sacrificado no noso país nun momento en que o sector de vacún español experimentou unha forte expansión, para pasar a ser exportador neto de carne de vacún, constituíndo, pola súa vez, un dos piares para promover as medidas de ordenación do sector previstas na organización común de mercados da carne de vacún.

Non obstante, o mero paso do tempo e a necesidade de trasladar ao noso marco legal as sucesivas modificacións normativas dos regulamentos comunitarios aconsella, sen prexuízo da aplicación directa dos regulamentos, pór ao día a norma nacional para efectos de clarificación de determinadas disposicións que convén actualizar de acordo coa experiencia obtida nestes anos de aplicación do sistema de clasificación.

Recóllese no articulado a codificación das disposicións do Regulamento (CEE) n.º 1208/81 do Consello, do 28 de abril, que estableceu o modelo comunitario de clasificación das canais de vacún pesado, coñecido como modelo SEUROP, e a súa substitución polo Regulamento (CE) n.º 1183/2006 do Consello, do 24 de xullo de 2006, sobre o modelo comunitario de clasificación de canais de vacún pesado, así como as disposicións específicas sobre conformación e estado de engraxamento recollidas no Regulamento (CE) n.º 103/2006 da Comisión, do 20 de xaneiro de 2006, polo que se establecen disposicións complementarias para a aplicación do modelo comunitario de clasificación das canais de bovinos pesados.

Outras disposicións de aplicación, adoptadas despois da entrada en vigor do Real decreto 1892/1999, do 10 de decembro, introducen novos requisitos sobre identificación e rastrexabilidade, como é o caso do Regulamento (CE) n.º 2181/2001 da Comisión, do 9 de novembro de 2001, que modifica o Regulamento (CEE) n.º 563/82 da Comisión, do 10 de marzo, polo que se determinan as modalidades de aplicación do Regulamento (CEE) n.º 1208/81 para o rexistro dos prezos de mercado dos bovinos pesados, baseándose no modelo comunitario de clasificación das canais; en concreto, no que concirne ao criterio para distinguir as canais dos machos novos sen castrar, que permite utilizar a información dos vixentes documentos de identificación de bovinos (DIB), recollidos na actualidade no artigo 9 do Real decreto 1980/1998, do 18 de setembro, polo que se establece un sistema de identificación e rexistro dos animais da especie bovina. Ademais, a aplicación dos sistemas de etiquetaxe obrigatoria para clasificación debe harmonizarse coa etiquetaxe obrigatoria da carne de vacún para efectos de rastrexabilidade, segundo se prevé no artigo 4 do Real decreto 1698/2003,